

Im Fäld de gätt ä Jöngle 'röm,
 Das blait nert stänn on sitt sich nert öm,
 Es setzt sich nirt, hat goar kä Ru,
 On läfft o rennt ner ömmerzu,
 Dröm häßt me's die Bauerschärbet.

Fri worsch noch dort, zont eß schu doe,
 Es läfft sich wärzig blizwimmeligbloe,
 Es sprängt, daß 's bänoeh den Oadem verleußt
 On Schwääß genunk den Buckel 'na fleußt,
 Dröm häßt me's die Bauerschärbet.

Die Trapfe rammeln vo sänn Gesicht,
 Bi Thaa vo den Gras in Morgelicht;
 Es wescht se mit den Ärmel 'ra
 On läßt vo sänn Spränge doch nert a,
 Dröm häßt me's die Bauerschärbet.

Gätt's vern Wasser verbei des närrisch Dänk,
 So hat's halt Duurscht on mög getränk,
 Mit der hohle Haand greüft's dreimal'nei
 On läfft dernach noch schneller verbei,
 Dröm häßt me's die Bauerschärbet.

Es schüütelt die Beem ach onnerwäs
 On melkt debei die Kuh on die Gäs;
 Fri ropft's noch Gens, zont schiert's die Schaff,
 On kom e Beßle sitt me's schlaff,
 Dröm häßt me's die Bauerschärbet.

Erscht nachte, ackert's so gut me ner koo,
 On heut holt's schu den Kleä devoo;
 Morn lät's Kärtoffel in den Saand
 On setzt des Kraut mit der annere Haand,
 Dröm häßt me's die Bauerschärbet.

Erscht übernachtet soet's des Korn
 On will's schu 'ra schneid übermorn,
 Dezwesche meäht's die Wiese aus
 On thutt dann ach die Rube 'raus,
 Dröm häßt me's die Bauerschärbet.

Es setzt des Geträd in lange Rieh,
Drescht denn im Stadel on füttert des Vieh,
On hat's bä sänn Mache des Elend verlorn,
Fängt's alles widder oo vo vorn,
Dröm häßt me's die Bauerschärbet.

Es grippelt o grapelt Joeraus, Joerei
Off den Fällern 'röm, on läßt's nert sei,
Es schennt sich o plagt sich, das schmäckt nert süß,
Dann Bloese kriegt's oo Henn o Füß,
Dröm häßt me's die Bauerschärbet.

Es sprängt o rennt ner ömmerzu,
On selber den Sonntig hat's kä Ru,
När leenksemer gätt's in den Fällern 'röm
On sitt sich manchmal e Beßle öm,
Dröm häßt me's die Bauerschärbet.

Eß aber der Sonntig fangst verbei,
Dann rennt's zum Moentig on Deistig 'nei
On hält erscht widder im Spränge oo,
Bann der Sonnabed kömmt, der Himmelsmoo,
Dröm häßt me's die Bauerschärbet.

Wall unner Jöngle Knall o Fall
Im Fäld muß hi o her trawall,
Ze wommen äppes Fröd'ges bräng
On zu sänn Gehöpf ä Liedle säng,
Des Lied vo der Bauerschärbet.

Anonym. Hennebergisch